

CARLO ROBERTO MARIA REDAELLI

A BETANIE

Letare pastorâl pal secont an

dal Percors sinodâl (2022-2023)

IL VÂS DI PANDORE	
Un mît antic e la situazion atuâl	<p>1. Pandemie, vuere, sut, fûcs, inflazion, crisi energetiche, crisi climatiche, crisi economiche, e v.i.: ce mancjal ancjemò? Al somee che in chescj agns cualchidun al vedi viert cun imprudence il “vâs di Pandore” e che di chest a son daûr a vignâ fûr ducj i mâi. La espression “vâs di Pandore” e fâs riferiment al mît grêc che nus à tramandât Esiodi (<i>Teogonie</i>, 565-616; <i>Lis oparis e i dîs</i>, 42-105). Zeus, par cjastiâ i oms che il titan Prometeu ur veve concedût il fûc puartantlu vie a lis divinitâts, al fâs creâ la femine. A jê dutis lis divinitâts dal olimp i regalin dons magnifics e par chest e ven clamade Pandore (par grêc “ducj i dons”), ma Zeus i consegne ancje un misteriôs vâs sierât. Pandore no resist a la tentazion di vierzi il vâs e cussì a vegnin fûr ducj i mâi che dopo di chê volte a cruziaran dute la umanitat.</p> <p>Pandore e cîr di sierâ daurman il vâs, ma no rive a tratignâ ducj i mâi. Une realtât, dome une, e reste tal vâs, chê che par grêc si clame “elpís” e che par furlan o voltin “sperance”. Cemût interpretâ chest fat? La sperance e je restade sierade tal vâs, duncje tal mont sono dome i mâi? O pûr la sperance ise restade a disposizion dai oms, tant che ultin don? Cemût puedial jessi però che intun vâs plen di mâi al sedi alc di positif come la sperance? Cualchi studiôs al sosten che nol sedi just voltâ “elpís” cun “sperance”. La traduzion corete e sarès invezit “timôr dal futûr”, la pôre di chel che al pues capitâ: un mâl, duncje. Ma sino sigûrs che nol sedi vignût fûr dal vâs di Pandore? No vino forsi ducj pôre dal futûr, di chel che nus spiete consideradis lis premessis di chescj agns?</p>
Ambiguitât da la sperance dal mît grêc e la sperance cristiane	<p>2. Tal test plui antic dal Gnûf Testament, la prime letare ai Tessalonicêsc scrite tor l'an 53, l'apuestul Pauli al aferme che i cristians, ancje devant dal drame da la muart, no son avilits «<i>come chei altris che no àn sperance</i>» (1Ts 4,13). I cristians a son duncje chei che a àn sperance e la lôr sperance si fonde su la fede tal Signôr muart e resussitât. No je une sperance ambigue, come ch'e reste tal vâs di Pandore, ma une sperance vere, afidabile, cualsisei robe e ves di capitâ. Ancje in presince di pandemiis, vueris, crisis, e v.i., pûr condividint cu lis feminis e i oms di vuê preocupazions e patiments, i cristians a san che a la fin “dut al è gracie” (Taresie di Lisieux).</p>
LA SPERANCE E LA CJASE DI BETANIE	
Une cjase comude e ospitâl	<p>3. Intun suburbi di Gjerusalem, abitât cun dute probabilitât di Galileos e dulà che dispès i pelegrins, che da la Galilee a lavin a Gjerusalem par la Pasche e lis altris fiestis, a cjatavin ospitalitât li di parincj e amîs, e jere une cjase ch'e lave juste ben par Gjesù, chê dai</p>

	trê fradis Marte, Marie e Lazar. Une cjase grande, buine par ospitâ Gjesù cui siei dissepui e lis sôs dissepulis. Une cjase che si fevele in doi Vanelis, chel di Luche e chel di Zuan. Si trate da la cjase di Betanie. Une cjase dulà che Marte e à di imparâ che il prin servizi a Gjesù al è scoltâ la sô Peraule, juste apont come ch'e à sielt la sûr Marie (Lc 10,38-42).
Une cjase dulà che a jentrin la malatîe e la muart	4. Une cjase però dulà che a jentrin la malatîe e la muart, realtâts che a metin in dificoltât la buine fede da lis dôs sûrs viers il Signôr: « <i>Signôr, se tu fossis stât ca, gno fradi nol sarès muart!</i> » (Zn 11,21), i dîs deludude Marte al amì. Il muart al è Lazar, fradi di Marte e Marie, che al è presentât a Gjesù come « <i>chel che tu i vuelis tant ben</i> » (Zn 11,3). Al somee duncje metude in dificoltât l'amicizie stesse cul Signôr. La sperance e reste ta lis sûrs, ma al somee alc che al rivuarde dome un futûr lontan e no il presint: « <i>o sai che al resussitarà te resurezion da la ultime dì</i> » (Zn 11,24), e aferme Marte cun riferiment al destin finâl dal fradi muart. Ma dulà che al è Gjesù li no pues no jessi la sperance e une sperance atuâl, parcè che Lui al pues dî di se stes: « <i>Jo o soi la resurezion e la vite; cui che al crôt in me, ancje se al ves di murî, al vivarà; ducj chei che a vivin e a crodin in me, no muraran par mai</i> » (Zn 11,25-26). Lis dôs sûrs lu capissin parcè che a assistin a la resurezion dal fradi, ma no san ancjemò parcè che Gjesù al è resurezion e vite. Lu intuissarà Marie, intun altri episodi evangjelic, ancje chest contât di Zuan tal cjap. 12 e simpri ambientât a Betanie.
Il profum da la Pasche	5. « <i>Sîs dîs prin di Pasche, Gjesù al le a Betanie, là che al jere Lazar, che Gjesù al veve resussitât dai muarts. E li i prontarin une cene: Marte e servive e Lazar al jere un dei comensâi. Marie alore e cjolè tresinte grams di profum di nart rût, une vore preziôs, e onzè i pîts di Gjesù, po jai suià cui siei cjauei, e dute la cjase si jemplà dal bon odôr di chel profum. Alore Gjude Iscariot, un dai siei dissepui, che al stave par tradîlu, al disè: "Parcè no si aial vendût chest profum par tresinte denârs e no si ju aial dâts ai puars?". Però lu disè no pal fat che i stessin a cûr i puars, ma parcè che al jere un lari e, dal moment che al tignive la casse, al strafuive ce che a metevin dentri. Gjesù dissal alore: "Lassile fâ, par che jê lu meti vie pal dì da la mè sepulture. I puars di fat ju varês simpri cun voaltris, ma no simpri mi varês me"</i> » (Zn 12,1-8). Il profum che Marie e à butât al è straçât, al pues someâ parfin une ofese ai puars, come che al insinue Gjude ("Parcè no si aial vendût chest profum par tresinte denârs e no si ju aial dâts ai puars?" (Zn 12,5). Invezit al è prove dal amôr, da la gratuitât dal amôr, che si difont ator e al jemple dute la cjase sence nissun secont fin. Juste come la vite di Gjesù butade su la crôs. La rispueste di Gjesù a la obiezion di Gjude e je straordenarie: « <i>Lassile fâ, par che jê lu meti vie pal dì da la mè sepulture</i> » (Zn 12,7). Tal Vanzeli di Zuan no si

	<p>fevele da lis feminis che a preparin i balsims e i vuelis profumâts la sere dal vinars sant par lâ al sepulcri la prime dì da la seteman, come che nus conte l'evangelist Luche. A la sepulture di Gjesù i pensaran Josef di Arimatee e Nicodem che al puartarà une cuantitât esagjerade di profum (trente chilos!), lui che al veve za vût stât ca di Gjesù di gnot cu lis sôs obiezions di inteletuâl e che in chel moment al capìs che chel che al conte al è l'amôr, rapresentât dal profum (Zn 19,38-42). Marie lu veve capít prime di lui, intant da la cene di Betanie “straçant” il profum e intuint cussì il significât di amôr da la muart e da la sepulture di Gjesù.</p>
La Pasche fondament da la sperance	<p>6. Il fondament da la sperance al è la Pasche di Crist, la sô muart e resurezion, ch'e je il centri dal anunzi cristian, il “kerigma”. Pape Francesc lu presente cussì te esortazion apostoliche <i>Evangelii gaudium</i>: «<i>Gjesù Crist ti vûl ben, al à dât la sô vite par salvâti, e cumò al è vîf dongje di te ogni dì, par iluminâti, par infuartîti, par liberâti</i>» (EG 164). La Pasche e disvele dal dut il disen di salvece di Diu, parcè che li il Fi al à dât dut se stes par noaltris che o sin pecjadôrs. E je la Pasche, il don di se dal Fi, ch'e palese ad in plen l'amôr grant tant che mai di Diu par la umanitât, ch'e palese il so amôr come creatôr e come compiment di dut. Di li nus ven donât il Spirit che al ilumine di sens la nestre vite e al palese il disen dal Pari, che nus à creât par mieç dal Fi tal Spirit e in Crist dut al sarà compendiât e a la fin Diu al sarà dut in ducj. Su la strade viers il compiment, come che al dîs pape Francesc, il Fi al è dongje di noaltris ogni dì sicutu fradi, amì, salvadôr.</p>
La sêt di sperance e il percors sinodâl	<p>7. L'anunzi di pasche al è chel che ancje vuê i oms che a àn sêt di sperance, plui o mancul cussients, a spietin. E juste cuant che tantis sigurecis al somee che a ledin al mancul, e ven a flôr la dibisugne di une sperance e di une “sperance afidabil”, come che le definitive pape Benedet (<i>Spe salvi</i>, 1-2), dulà ingrampâsi. Bisugne scoltâ cheste sêt e savê viodi i segnâi di sperance presints te Glesie e tal mont. Il percors sinodâl al pues jessi un strument par intivâ cheste sêt di sperance, massime te sô prime fase, caraterizade dal scoltâ, che nus impegnarà ancjemò in chest an pastorâl. E dâi un non: Gjesù Crist. L'obietif dal sinodi, dal cjaminâ adun sicut Glesie nol pues jessi che la mission, par che ducj a podedin vê part da la sperance cristiane e la comunion di amôr tra Diu e i oms e podedi cressi te storie in spiete dal so compiment complet.</p>
	<h2>IL NESTRI PERCORS SINODÂL DENTRI DAL PERCORS DA LA GLESIÉ TALIANE E UNIVERSÂL</h2>
Il percors sinodâl al va indevant	<p>8. La “cjase di Betanie” e je il lûc proponût da la Conference episcopâl taliane pal secont an dal percors sinodâl da lis Glesiis in</p>

	<p>Italie. Une cjase là che nus ven domandât di sostâ insieme cun dutis lis Glesiis sûrs tal secont an dal percors sinodâl, che, su indicazion di pape Francesc, o vin inviât tal mês di Otubar dal 2021 e che si concluderà tal 2025.</p> <p>L'an passât ancje noaltris o sin jentrâts in chest percors che al à metût al centri il scoltâ. A dispiet dai ostacui da la pandemie, al è stât un impegn significatîf de bande dal grup incaricât di vuidâ il percors diocesan e di tantis realtâts che si son associadis. Un grum di personis a son stadiis scoltadis, che spes si maraveavin da l'attenzion che si veve par lôr, ma ancje desiderosis che il lôr confidâsi nol colâs tal vueit. No si à fat di mancul di scoltâ ancje i zovins in gracie da la disponibilitât dai insegnants di religjon e si à podût viodi cetant che a sedin interessâts a rivuart da lis domandis fondamentâls da la vite e ancje vierts a un confront sclet e diret cu la Glesie. Risultât di cheste iniziative diocesane a son stâts i doi tescj finâi, publicâts tal fassicul <i>"In ascolto. Sintesi dei contributi diocesani della fase narrativa del percorso sinodale"</i> (discjariabil dal sít diocesan), che a puedin jessi une base otime pal percors di chest secont an adun cui risultâts da la sperimentazion dal sisteme da la "conversazion spirituâl". Tal prin an si à ancje colaborât cu lis altris trê diocesis da la region cul inviâsi unitari dal percors inte basiliche di Aquilee ai 17 di Otubar dal 2021 e il confront su cuatri tematichis: la caritât, il servizi dai laics, la pastorâl dai zovins, la pastorâl sociâl e dal lavôr. Di dut chest impegn sinodâl o dovìn jessi pardabon grâts al Signôr, a cui che lu à coordenât e proponût e a cui che al à partecipât cun grande disponibilitât.</p> <p>L'insiemi dai tescj risultât da la consultazion sinodâl da lis diocesis talianis (tra chestis al è clâr e je ancje la nestre) al è lât a finî inte "Sintesi nazionale della fase diocesana del Sinodo 2021-2023", che si pues lei tal sít: https://camminosinodale.chiesacattolica.it/. La sintesi taliane si unissarà, inte fase continentalâ dal Sinodi dai Vescui dal 2023, cun chê da lis altris Glesiis europeanis: il document da la fase continentalâ al vignarà in ogni câs fat cognossi a ogni Glesie.</p> <p>Il percors sinodâl da la Glesie taliane invezit al va indevant cuntun secont an dedicât al scoltâ. Un scoltâ sinodâl e duncje un scoltâ "biel cjaminant", che za al trasforme la comunitàt ch'e scolte, ma ancje cui che al jentre in dialic cun cheste.</p>
I cantîrs di Betanie	<p>9. Il test, preparât da la Conference episcopâl taliane, intitolât <i>"I Cantieri di Betania. Prospettiva per il secondo anno del Cammino sinodale"</i>, al fâs riferiment a la cjase e al païs di Marte, Marie e Lazar. Il document si pues lei tal sít al link indicât parsore. Lu ripuarti cun bondance in cheste letare, parcè che o volin cjaminâ cun cordialitât e disponibilitât cun dutis lis Glesiis sûrs da la nestre nazion, di sigûr cu la nestre identitât e cu lis particolaritâts che nus son propriis, ma intune vere esperienze di comunion e di catolicitât. Il test da la Conference episcopâl taliane, cjapant come riferiment</p>

	<p>Betanie, al propon trê cantîrs:</p> <ul style="list-style-type: none"> - Il <i>cantîr da la strade e dal paîs</i>: che al domande di scoltâ chei ambits che la comunità cristiane spes ur da mancul abade, o sei il mont vast da lis puaretâts, i ambients da la culture (scuele, universitat e ricerche), da lis religjons e da lis fedis, da lis arts e dal sport, da la economie e finance, dal lavôr, da la classe imprenditorial e da lis professions, dal impegn politic e sociâl, da lis istituzions civils e militârs, dal volontariât e dal setôr terziari; - Il <i>cantîr da la ospitalitât e da la cjase</i>: che al fâs riferiment a la comunità cristiane al so interni, o sei a lis sôs relazions, a lis sôs struturis, ai organisims di partecipazion; - Il <i>cantîr da lis diaconis e da la formazion spirituâl</i>: che i sta daûr al ambit dai servizis e dai ministeris eclesiâi.
Un cuart cantîr: la iniziazion cristiane	<p>10. La Conference episcopâl taliane e suggerîs la possibilîtât che ogni diocesi e previodedi ancie un “cuart cantîr”. In realtât la nestre diocesi e à vriet za di temp un cantîr che al è oportun inviâsi a dâi une definitivitât: chel da la iniziazion cristiane. Cun di fat za di tancj agns si sta lavorant su la iniziazion cristiane dai fruts e dai adolessents. E di cualchi an al è partît ancie un percors pai adults che a domandin di deventâ cristians o di completâ il percors interot da la iniziazion cristiane cul ricevi il sacrament da la Conferme (e, in cualchi câs, ancie cul partecipâ par la prime volte ad in plen a la celebrazion eucaristiche). Al pues jessi util a chest pont dâ ufficialitât ai itineraris fin cumò sperimentâts e proponiju cun autoritât a ogni unitât pastorâl e parochie. No par imponi uniformitât, ma par vivi une comunion réâl dentri da la uniche Glesie diocesane e par rispietâ i fedêi e ducj chei che si fasin dongje a la comunità cristiane che a àn dirit di ricevi une propueste univoche ancie se si trasferissin di une parochie in chê altre, pûr cu lis legitimis particolaritâts locâls e dutis lis atenzions dovudis a lis diversis situazions personâls e familiârs. L'adesion a lis indicazions diocesanis a nível pastorâl e garantîs ancie la continuitât tal câs dal cambi e dal subentrâ di plevans e altris predis, di diacuns, di religjôs e religjosis e ancie di fedêi, oms e feminis, incaricâts di particolârs ministeris.</p>
La suaze da lis unitât pastorâls: par une lôr maturazion midiant dal percors sinodâl	<p>11. La nestre diocesi e vîf i diviers cantîrs dentri la suaze da lis unitât pastorâls. Si trate di un contest une vore favorevul par la consultazion sinodâl se no altri par motîfs pratici: al ufris plui possibilítât di incuintrâsi e di scoltâsi, al da la oportunitât di vê plui personis disponibilis a impegnâsi a vuidâ il percors sinodâl o in ogni câs a jessi coinvoltis. Ma il percors sinodâl stes al pues jessi une occasion particolâr par un percors di maturazion par ogni unitât pastorâl, fasint miorâ la comunion e la cognossince al so interni, vierzint a la mission bande cui che al è lontan o ai limits da la comunità cristiane, slargjant la partecipazion a la vite da la</p>

	<p>comunitât, creant la oportunitât par individuâ e prudelâ gnovis colaborazions.</p> <p>Chest an pastorâl al pues duncje deventâ un moment significatîf par une verifiche da lis unitâts pastorâls, inviadis in diocesi a tacâ soredut dal 2018, une verifiche però no “in maniere teoriche”, ma dentri di un percors sinodâl di maturazion, scomençant dai diviers “cantîrs”. Sence dismenteâ i motîfs che a àn puartât a la sielte da lis unitâts pastorâls e ai obietîfs che a vuidin il percors pastorâl. Al pues jessi util tornâ a leiju presentâts tai nn. 29-41 da la letare pastorâl “...ancje jo us mandi vô” par l'an pastorâl 2018-2019 (che si pues discjariâ dal sít diocesan).</p> <p>Spietant di tornâ fâ la visite pastorâl interote da la pandemie, o volarès in ogni câs in chest an pastorâl incuintrâ un par un ducj i responsabii da lis unitâts pastorâls, i grups (se costituîts), i conseis pastorâi unitaris.</p>
Une Glesie vive, plene di dons, buine di dâ sperance	<p>12. Il percors sinodâl diocesan al va indevant intune Glesie plene di graciis e di dons. Di chest o dovin jessi une vore agrâts al Signôr e a cui che, pûr cun limits, fadiis e pecjâts, al cîr di vivi cun scletece il Vanzeli dentri da la nestre diocesi. Un agrât prin di dut a cui che nus à precedût e cumò nus assist te comunion dai sants cu la sô preiere di intercession e cul so afiet. A chest proposit e je stade tant significative la iniziative da l'Azion Catoliche diocesane ch'e à publicât trê volumuts dedicâts a lis feminis, ai oms, ai assistents che a àn fat part dal so percors in chescj 100 agns.</p> <p>Ma a son necessaris anche un agrât e un incoragjament a chei che a vivin vuê l'aventure dal Vanzeli. Te ultime assemblee diocesane dal an pastorâl stât o ai volût ricuardâ diviers dons che a caraterizin la nestre Glesie. Ju elenchi no par contentâ une nestre supierbie e presunzion, ma par stimolâ ducj a lâ indevant cun fede e sperance, une sperance di donâ a cui che o incuintrìn sul nestri percors. Si trate dai dons segnâts ca sot:</p> <ul style="list-style-type: none"> - la presince di tantis personis, predis, diacuns e laics e religjosis e religjôs, che a crodin tal Signôr e che a àn voie di partecipâ, che a cjapin a cûr lis robis, a àn une vere passion pal Ream e a àn part tai tancj ambiti di responsabilitât; - la gjenerositat e l'impegn tal lavôr pastorâl dai sacerdots, dai diacuns, da lis religjosis e dai religjôs, di tancj laics e laichis e da lis comunitàs; - la presince di svariadis agregazions laicâls, che, mantignint la lôr identitât e il lôr carisme, no àn chê di jessi la “Glesie”, a àn un respîr diocesan e a san colaborâ tra di lôr e cu lis parochiis; - il jessi lidrisâts te grande tradizion di Aquilee, Glesie mari dal cristianism intune region une vore vaste; - il multiculturalism e il jessi incuadrâts come Glesie “sul confin”.

	<p>Forsi cualchidun al ricuardarà che sul inviâmi a cognossi la nestre diocesi, a pene rivât ca dîs agns indaûr, par fâmi presentâ lis diviersis realtâts eclesiâls o vevi sugjerît la formule “3,2,1”: 3 robis bielis, 2 siums e 1 probleme. Al sareà biel ch'e deventâs une formule di doprâ simpri par descrivi lis nestris comunitâts.</p>
Une Glesie ch'e vûl cressi in spirit diocesan e profonditât spirituâl	<p>13. Ma a son ancje ponts debui che a domandin la nestre atenzion, ricuardâts ancje ta l'assemblee dal mês di Jugn dal 2022.</p> <p>Il prin al è chel di no rivâ ancjemò a vivi adun come comunitât diocesane. Ognidune da lis realtâts e tint a lâ par so cont e spes lis propuestis diocesanis, che magari a son fatis da lis comunitâts locâls, no vegnin po metudis in vore o osservadis. Co al va ben, si zontin al percors parochiâl, ma juste tant che alc in plui. In realtât o dovaressin invezit cressi adun par elaborâ e meti in pratiche un percors diocesan comun, che po ogni realtât e savarà interpretâ al miei cu lis sôs carateristichis. In chest sens imparâ un stîl sinodâl al pues jessi une vore util. E chest ancje tal rapuart tra comunitât e cui che al à un compit di responsabilitât pastorâl.</p> <p>Un secont aspiet di debolece, che o vin ducj, ancje jo, al è une dimension spirituâl ch'e presente elements di fragilitât. Spes no dedichìn avonde temp a la preiere, al scoltâ la Peraule di Diu, a la riflession, al cidinôr, al ritîr spirituâl, ma ancje al cognossi e al aprofondî la nestre fede, altri che a meditâ su la culture e la societât di vuê. Il pericul al è chel di distudâsi un pôc a la volte. Chest al vâl par ducj, scomençant dal vescul, i predis, i diacuns, lis consacrâdis e i consacrâts e i laics, massime chei impegnâts in cualchi ministeri o incaric eclesiâl.</p> <p>Par altri, la dimension spirituâl e je fondamentâl par la fraternitât. Si cjate une vere comunion no dome in sens orizontâl ta lis relazions personâls - impuantantis tant che mai - ma in profonditât. Plui che o preìn un par chel altri, plui si confrontin adun su la Peraule di Diu, plui ancje di bessôi o jentrin intune autentiche comunion cul Signôr e plui o podin cjatâ une reâl e fuarte comunion tra di noaltris. Che si dêf po palesâ in ats concrets che cûrs zentii a suggerissin.</p>
La responsabilitât dal grup sinodâl	<p>14. Prime di jentrâ tal pont dai cuatri cantîrs, fasint riferiment par la plui part a lis indicazions da la Conference episcopâl taliane, al covente dâ cualchi drete su cemût utilizâ cheste letare e ancje su cui che al à la responsabilitât di curânt la savie atuazion. A proposit di chest impegn, o confermi ancje par chest an l'incaric al grup sinodâl. Chest al continuârà a jessi in colegament cui organisims che a curin il percors sinodâl a nivel nazionâl e di Glesie universâl e al metarà adun lis indicazions e i suggerimenti di meti in pratiche te nestre diocesi. A chest i spiete ancje di dâ indicazions concretis dilunc dal an pal percors sinodâl, in colegament e colaborazion cui uffis e servizis di curie, su la fonde da lis liniis pastorâls puartadis indevant dai diviers organisims di partecipazion e aprovalis dal vescul: consei</p>

	dai vicjaris, diacuns, coleç dai consultôrs, consei presbiterâl, consei pastorâl diocesan, responsabii da lis unitâts pastorâls.
Mût di doprâ cheste letare	<p>15. Par judâ po a individuâ i tancj impegn, lis indicazions di caratar operatîf, i schemis di domandis pal lavôr sinodâl e dut ce che al pues coventâ tal concret si vise che a saran ricognossibii pal sfont colorât.</p> <p>Indicazions pal ûs da la letare pastorâl:</p> <ul style="list-style-type: none"> • la letare, cul test metût in zonte, e à di jessi lete cun atenzion e riflession personâl prin di dut dai operadôrs pastorâi (predis, diacuns, religjôs e religjosis, laics e laichis cuntun incaric ministeriâl, membris dal consei pastorâl); • intune o plui riunions dal consei pastorâl da la unitât pastorâl (o parochiâl) si podarà decidi cualis iniziativis realizâ, tra chês proponudis in cheste letare, dilunc dal an tal ambit da la unitât pastorâl cun atenzion a lis sieltis dai deans, e stabilint ancje cui che al cjape sù il caric; • no ducj a devin fâ dut: l'impuartant al è che a la fin dal an pastorâl al sedi stât fat un vêr pas indevant adun (apont "sinodâl") de bande da lis comunitàs in riferiment a cualchi element dai cuatri cantîrs; • par judâ l'impegn ordenari da lis personis e dai diviers organisims ("cui che al fâs, quant e ce") in zonte a cheste letare si torne su lis diviersis propuestis distribuidis te letare stesse, metudis adun par sogjet (ZONTE 2); • in zonte a son indicadis in sintesi ancje lis fasis dal percors sinodâl in chest an pastorâl (ZONTE 1); • l'inviament da lis diviersis atividâts, la lôr metude in vore e la consegne di ce che al è stât realizât al à come riferiment il grup sinodâl e lis indicazions dai uffis e servizis di curie; • tai prins mês dal an pastorâl e je previodude cualchi propueste di formazion pai operadôrs pastorâi e par cui che al sarà clamât a seguî lis diviersis iniziativis.
	IL CANTÎR DA LA INIZIAZION CRISTIANE: UN CANTÎR DAL ACET E DAL SCOLTÂ
La iniziazion cristiane e il scoltâ sinodâl	16. Parcè vegnial metût par prin il "cuart cantîr"? Par diviers motîfs. Il prin al è che si trate di un teme che al tocje di dongje, e tant, lis nestris comunitàs costituint une da lis plui impuantantis atividâts ch'e caraterize la plui part dal an pastorâl di ogni unitât pastorâl e parochie. Une seconde reson, come za dit, e je il fat che fin cumò, a dispiet dai tentatîfs di agns, no si è anjemò rivâts a converzi viers un percors unitari a nivel diocesan. E esist po une motivazion fuarte leade al percors sinodâl e, in particolâr, a la fase dal scoltâ che o sin clamâts a vivi ancje in chest secont an: scoltâ e acetâ cui che al

	<p>domande a la comunità di jentrâ a fânt part o par completâ il so percors di ingrès te comunità stesse. Al sarès strani che si dedicâs timp, atenzion, empatie e massime a scoltâ cui che alreste intun ciert sens fûr da la comunità cristiane e no a cui che al fâs za part, come i gjenitôrs che a domandin che i fîs a podedin ancje lôr jentrâ a fânt part cul Batisim, o a cui che al brame di inserîsi, come i zovins e i adults che a domandin di jessi batiâts o di ricevi il sacrament da la Cresime. Un scoltâ che al dêf deventâ acet e partecipazion.</p> <p>La domande fondamentâl di chest cantîr e je: <i>cemût podino “cjaminâ adun” par jessi une communauté ch’è forme a la fede?</i></p>
La propueste diocesane par fruts e adolescentes	<p>17. A rivuart da la propueste par la iniziazion cristiane dai fruts e dai adolescentes, la esperience di agns di diocesis talianis, che si son preparadis e impegnadis in chest cjamp plui da la nestre, nus insegne che no esistin “ricetis magjichis”, buinis di risolvi dal dut o quasi problemis come chel da la “base” di vite cristiane di dulà scomençâ cui fruts (classiche di decenis la osservazion sconsolade dai catechiscj: “no san nancje fâ il segn di crôs”) o da la continuitât da la partecipazion co no je scuele o dopo di vê ricevût i sacraments (in ogni câs, la crisi di fede adolescentiâl e je alc di inevitabil e al sarès strani se nol fos cussì, come se la fede e fos un dât imutabil che nol cres cul adolescent ...).</p> <p>La propueste diocesane su la iniziazion cristiane 0-14 agns, ch’è vignarà presentade ca di pôc in maniere ufficiâl, no à duncje nissune pretese di jessi la miôr o chê decisive par risolvi infin i problemis. E met a pro invezit lis indicazions dal magjisteri pontifici, dai diviers documents e comunicâts pastorâi sul argoment da la Conference episcopâl taliane, da la esperience di altris diocesis e di chê za svilupade in tantis nestris parochiis e unitâts pastorâls. E vûl duncje jessi un pas di maturazion condividût, realistic e fatibil. E nancje dîlu si pues simpri miorâle cul contribût di ducj. Ma intant e larà fate buine, evitant poltronariis, personalisims, apei a suponudis situazions speciâls par justificâ il so refût. Par diviersis unitâts pastorâls e parochiis no saran tancj cambiamenti parcè che chel che si è daûr a proponi al è za part da la vite di vuê dì; par altris a coventaran integratzions e cambiamenti parziâi.</p>
Scoltâ i gjenitôrs in occasiun dal Batisim	<p>18. Da la propueste diocesane o volarès meti in evidence in cheste letare dome l’aspief dal scoltâ, lassant a lis iniziativis dal ufici catechistic la propueste di incuintris formatîfs, sussidis, iniziativis vie pal an (ancje in coleagament cui altris ufficis e servizis, come la Caritas diocesane, il Centri missionari, la Pastorâl dai zovins e chê da lis vocazions).</p> <p>Za agns indaûr si veve lavorât sul teme dal scoltâ e dal acet. Il titul da la letare pastorâl par l’an 2014-2015 al jere: “<i>Une Glesie ch’è scolte e ch’è aceté</i>”. Chel test, che al veve tant che riferiment la</p>

	<p>letare ai Romans, al insisteve sul Batisim e su la iniziazion cristiane. Il percors di chescj agns al palese in proposit lûs e ombris e nus domande di madressi di plui la cussience che al Batisim e, plui in gjenerâl, a la iniziazion cristiane si à di dedicâ temp e energiis anche in maniere prioritarie rispet a altris impegnis.</p>
Cualchi atenzion sul scoltâ a rivuart dal Batisim dai fruts	<p>19. O propon cuatri atenzions di vê, lant daûr da lis indicazions dal Ufici catechistic e da la Pastorâl familiâr:</p> <ul style="list-style-type: none"> • tignint cont dal fat che il Batisim dai fruts al è daûr a deventâ simpri plui râr, co al nas un frut, une frute intune famee di amîs o anche di convicins al è impuantant jessi dongje ai gjenitôrs, scoltâju, condividint la contentece par une gnoe vite e lis preocupazions pal futûr. Di une biele relazion cun lôr, e podarès creâsi la oportunitât di fevelâ dal Batisim, cognossi lis lôr sperancis e perplessitâts, e se mai ufrîsi tant che tramat cu la comunitàt parochial (cun cui che al è incaricât da la pastorâl batesimâl insieme cul plevan); • in ocasion dai incuintris prime dal Batisim (de bande di catechiscj batesimâi e dal plevan) al covente prin di dut scoltâ i gjenitôrs, capî ce che lôr si spietin, lis lôr sperancis e preocupazions; • al pues jessi une vore util proponi vie pal an a nivel di unitât pastorâl un incuintri sinodâl dai gjenitôrs e dai santui dal ultin an (o dai ultins agns) par scoltâju insieme su la sielte di vê batiât il fi o la fie, su ce che si spietin da la Glesie come accompagnament, su la lôr disponibilitât a partecipâ, e v.i.; • valorizant la esperience impuantante madressude intant dal lockdown, al è oportun mantignî i contats cui gjenitôrs (domandantjur di lassâ un recapit), inviantjur cun discrezion, par esempi, i auguris in ocasion dal complean o dal aniversari dal Batisim, cualchi preiere facile di doprâ cul frut, il suggeriment di cualchi at religjôs sempliç e significatîf, l'invît a un o doi incuintris par lôr e i lôr fruts, e v.i. e fasint buinis lis lôr domandis, apei, suggeriments.
Il scoltâ tal percors dai 6 ai 14 agns	<p>20. Ancje il percors di iniziazion cristiane dai 6 ai 14 agns al à di jessi caratterizât chest an di une particolâr disponibilitât a scoltâ. O propon cualchi iniziative, fasint riferiment a chel che si è za daûr a fâ in tantis comunitàts:</p> <ul style="list-style-type: none"> • prime di scomençâ l'itinerari, a 6, 7 o 8, 9 agns, al è impuantant lassâ un pôc di temp pai incuintris personâi tra i catechiscj (e se possibil anche il plevan) e i gjenitôrs che a domandin di notâ i fruts o i adolescentes, rimandant l'inviament dai incuintris di catechesi. A devin jessi la ocasion di une prime cognossince, scoltâ i desideris dai gjenitôrs, presentâ il percors che al vignarà proponût vie pal an, viodi insieme quale educazion a la fede dai fruts e dai

	<p>adolessents vivi dentri da la famee cu la colaborazion da la comunità cristiane, e v.i.;</p> <ul style="list-style-type: none"> • Chê stesse robe e pues jessi ripetude ogni an co si torne a fâ il percors. L'incuintri personâl tra gjenitôrs e catechiscj (e plevan) al è fondamentâl par che il frut e l'adolescent a podedin sintî une condivision di obietîfs tra la famee e la comunità parochial; • cualchi incuintri cui gjenitôrs vie pal an si podarà fâlu cu la modalitat dal scoltâ sinodâl, daûr da lis indicazions dal ufici catechistic e da la pastorâl familiâr; • al coventarà ciatâ ancje pai fruts plui grancj (chei che si orientin viers la celebrazion dal sacrament da la Cresime) occasions pal scoltâ sinodâl cu lis modalitâts che a vignaran indicadis dal ufici catechistic e da la pastorâl dai zovins.
La propueste diocesane par la iniziazion cristiane dai adults	<p>21. Za di cualchi an e je stade metude in vore in diocesi une propueste specifiche pai adults che a domandin di deventâ cristians ricevint il Batisim, puartant insom il percors di catecumenât, e ancje par chei zovins e chei adults che par cualchi motif no an ricevût al moment just il sacrament da la Cresime e cumò lu domandin in viste dal sacrament dal Matrimoni, dal incaric di santul e ancje par une maturazion personal di fede.</p> <p>Spietant di vê in curt une propueste struturade, ancje su la fonde da la esperience vivarose di chescj agns, cul coinvolziment augurabil di cubiis di spôs cristians disponibii a jessi catechiscj in chest ambit, al è oportun inviulâ a pro di chest un scoltâ sinodâl specific. Cu la cussience che al pues jessi alc pardabon preziôs parcè che si indrece a adults che di solit no fasin part da lis nestris comunitàs in maniere stabile, ma che spes a cirin une rispueste ai tancj "parcè" da la vite. Scoltâju nol pues che fâ cressi lis comunitàs e rindilis plui ferbintis tal testemoneâ la sperance cristiane.</p>
Scoltâ i adults	<p>22. In concret ve ca cualchi piste par realizâ il scoltâ:</p> <ul style="list-style-type: none"> • ancjemò prime di meti in contat cul servizi diocesan specific i adults che si orientin viers la fede cristiane, al è impuantant jessi une vore disponibii cun lôr: scoltâju, acetâju, puartâsi di amì za de bande dai cognossints, dai coleghis di lavôr, dai amîs e po de bande dai sacerdots e dai catechiscj da lis parochiis che si aparten o che cun chês a jentrin in contat; • in chê stesse maniere si à di compuartâsi cui zovins e i adults che a domandin di completâ il percors di iniziazion cristiane cul sacrament da la Cresime (e, a voltis, ancje cu la prime partecipazion plene a la Eucaristie cu la Prime Comunion); • al è just che tai itineraris destinâts a lôr a nivel decanâl a sedin previodûts apontaments cul coinvolziment ancje da lis comunitàs che i cresimants a fasin riferiment; • il scoltâ al pues deventâ compagnament ancje de bande da la

	<p>comunitât cristiane metint a disposizion personis che a podedin fâ la funzion di santui e santulis;</p> <ul style="list-style-type: none"> • il Servizi diocesan par la iniziazion cristiane dai adults al invidarà i adults che si son batîts tai ultins agns e ancie cui che ju à compagnâts come catechiscj e santui o santulis a un moment par scoltâsi e par un confront sinodâl; • une iniziative dal gjenar e podarà jessi proponude, a nivel decanâl o di unitâts pastorâls vicinis, ai cresemâts adults dai ultins agns.
--	--

IL CANTÎR DA LA STRADE E DAL PAÎS

Scoltâ i "monts" pôc cognossûts da lis comunitâts	<p>23. Il cantîr da la strade e dal paîs al domande di dâ abade a lis personis che cun lôr i cristians a vivin e a lavorin e in particolâr chei "monts" che spes lis nestris comunitâts no ju cjapin avonde in considerazion. Il scoltâ al à il fin di aumentâ lis occasions di incuintri o ancie di favorî un prin contat, sigûrs che o sin ducj clamâts, praticants e no praticants, crodint o no crodint a cjaminâ adun, cu la responsabilitât comune viers la societât. I ambiti che al covente scoltâ cun atenzion a son chei da la miserie, da la disabilitât, dai forescj, da la preson, da la sanitât, da la culture, da lis religjons e da lis fedis, da lis arts e dal sport, da la economie e dal lavôr, dal impegn politic e sociâl, da lis istituzions civils e militârs, dal volontariât e dal setôr terziari.</p> <p>La domande fondamentâl di chest cantîr e je: <i>cemût il nestri "cjaminâ adun" puedial creâ spazis par un scoltâ reâl da la strade e dal paîs?</i></p>
---	---

Il probleme da la lenghe	<p>24. Tal incuintri cui varis "monts" bisugne jessi atents a lis lenghis. Si trate di une esigjence ricuardade da la Conference episcopâl taliane, ma vignude a flôr ancie tal prin an dal nestri percors sinodâl. Lis nestris lenghis – par exempli chê da la liturgjie, da la catechesi, ma ancie chê dentri da la comunitât cristiane (definide spes come "eclesialese") – no son facilis di capî par cui che al è intun ciert sens "esterni" a la vite ordenarie da lis comunitâts cristianis.</p> <p>Ma ancie la comunitât cristiane no simpri capìs lis fevelis dai diviers "monts". Al è naturâl que cualchidune di chestis e vedi une nature "tecniche" e e sedi par fuarce leade a grups specifics. No si pues pretindi alore di cognossilis e di capîlis. Ma il probleme nol è chest, pitost a son lis lenghis che lis personis dai diviers "monts" a doprin par fevelâ di se, par palesâ prospetivis, sperancis, patiments, preocupazions. Chestis sì si à di capîlis parcè que a coventin par instaurâ un rapuart uman vêr, que al è l'unic bon di costituî la occasion par ufrî la sperance cristiane. Un inzegnîr, une insegnant, un operari, un miedi, une badant, un militâr, e v.i. a son oms e feminis</p>
--------------------------	---

	<p>che si esprimin cuntune lenghe tecniche specifiche, ma, ancje midiant di chel che al costituìs il lôr mont, a fevelin in ogni câs di se. E a van scoltâts e scoltadis.</p> <p>Al covente ancje tignî presint che tantis dificoltâts a capîsi a derivin da lis culturis differentis, cun relativis visions dal mont, interiorizadis da lis personis, che a inderedin il dialic tra comunitàts eclesiâls e “monts”, come ancje tra gjenerazions.</p> <p>No bisugne lassâsi cjapâ dal aviliment o decidi che tant nol è pussibil capîsi. Al covente invezit scoltâsi cun disponibilitât e pazience e cirâ di capîsi, tal rispiet di un cul altri, mantignint tal cûr il desideri di jessi in ogni câs puartadôrs di un messaç di sperance.</p> <p>Tal dialic al podarà in ogni câs jessi une vore util, su la fonde da la esperience dal an passât, cirâ di adatâ ai diviers contescj il criteri da la “conversazion spirituâl”. Il grup sinodâl al darà indicacions par chel cont e al prudelarà il scambi di buinis pratichis.</p>
Scoltâ i “monts” a nível diocesan	<p>25. I diviers “monts” a puedin jessi scoltâts cun profit a plui nivei te nestre diocesi: diocesan, decanâl e di citât, di unitât pastorâl e di parochie.</p> <p>O indichi ca prin di dut cualchi “mont”, che te prime fase dal percors sinodâl no si è podût dâi la atenzion che i vûl, di scoltâ sul plan diocesan o in ogni câs cul coordenament dai ufcis e dai servizis di curie, e naturâl cul coinvolziment da lis comunitàts locâls:</p> <ul style="list-style-type: none"> • il mont dal volontariât, simpri par cure da la Caritas diocesane (significative la iniziative da la “fieste dal volontariât” proponude tal mês di Setembar); • il mont da la sanitât, cun atenzion ai ospedâi, a lis cjasis di cure, a lis RSA e a dutis chêts altris realtâts sanitariis e assistenziâls, par cure da la pastorâl sanitarie; • il mont dai rifugjâts e di chei che a domandin asil; • lis istituzions civils e militârs (di nível provinciâl). <p>Al è impuantant lâ indevant cu lis iniziativis a pro dal scoltâ za scomençadis l'an passât tal mont da la scuele, in gracie dal impegn dai insegnants di religion.</p>
A nível decanâl e di citât	<p>26. A nível decanâl e di citât, tignint ancje cont di altris precisacions di decidi tal ambit dai deans in acuardi cul grup sinodâl, si consee di vê miôr chescj ambiti:</p> <ul style="list-style-type: none"> • par la citât di Gurize (decanâts di Gurize e di Sant Andrat): puaretât, preson, universitât, scuele, confin; • pal decanât Aquilee-Çarvignan-Visc: puaretât, art, sport, turism; • pal decanât Gardiscje-Cormons: puaretât, lavôr, ambient; • pal decanât di Monfalcon-Roncjis-Duin: puaretât, lavôr, confessions cristianis, dialic interconfessionâl.
Scoltâ a nível di	27. I conseis pastorâi di unitât pastorâl (o di parochie),

unitât pastorâl e di parochie	<ul style="list-style-type: none"> • in plui di viodi cun cualis modalitâts aderî a lis propuestis diocesanis o di decanât o citât; • a curaran la ocasion par scoltâ lis istituzions civîls e militârs locâls; • a podaran sielzi di scoltâ altris su la fonde da lis occasions capitadis o cirudis tal contest locâl, simpri informant e cul coordenament dal grup sinodâl.
La iniziative missionarie dai singui	<p>28. L'impegn dal scoltâ i monts al pues jessi une ocasion impuantant par la iniziative missionarie dai singui cristians, clamâts a fâ di "punt" tra i monts che a frequentin par lavôr o par altris motîfs e la comunità cristiane ancje par iniziativis leadis al scoltâ sinodâl. Chest al è possibil, par esempli, cui coleghis di lavôr, cui gjenitôrs dai compagns dai propriis fîs, cui frequentadôrs di une palestre, cui membris di une associazion, e v.i.</p> <p>Il principi al è chel che o ai ricuardât plui voltis in chescj agns: "no bisugne scuindi di jessi cristian". Se tai ambients che tu frequentis si sa che tu sêts cristian, che tu vâs in glesie, che tu partecipis a la comunità parochial o che tu fasis part di une agregazion eclesiâl, nol dovarès jessi impussibil dî ai coleghis, cognossints e amîs: <i>"in parochie (in diocesi) a son daûr a organizâ un incuintri par scoltâ lis personis e sintî ce che a pensin e ce che si spietin da la Glesie, volêso vignî ancje voaltris?"</i>.</p>
	IL CANTÎR DA LA OSPITALITÂT E DA LA CJASE
Une comunitàt "cjase" ospitâl	<p>29. Il cantîr da la ospitalitât e da la cjase al invite a rifleti e a scoltâsi dentri da la comunità cristiane. Nancje dîlu, une comunitàt no sierade, ma ospitâl, buine di dâ acet, di fâ in maniere che si cjati ben cui che al ven in contat cun chê communauté, massime se puar o in ogni câs in dificoltât. Un pôc come la cjase di Betanie (o chê di Simon Pieri a Cafarnao) dulà che Gjesù, cui siei dissepui, si sintive pardabon "a cjase".</p>
	<p>La domande fondamentâl di chest cantîr e je: <i>cemût podino "cjaminâ adun" te coresponsabilitât?</i></p>
Trê grups sinodâi	<p>30. In ogni unitât pastorâl (o parochie) si varà di formâ trê grups sinodâi, costituîts prin di dut dai membris dal consei pastorâl e dal consei pai afârs economics e a chescj a podin zontâsi altris personis, in particolâr chei che a àn incarics dentri da la comunitàt.</p> <p>Par lis realtâts plui piçulis, se al fos dificil individuâ trê grups, si pues sielzi par trê sessions dal consei pastorâl, slargjadis a lis personis interessadis ai diviers ambiti. Ogni grup (o session) al à un teme specific:</p> <ul style="list-style-type: none"> • grup 1: la verifiche da la cualitât dai rapuarts internis a ogni

	<p>comunitât (“internis”, ma vierts cul esterni, prin di dut cu la Glesie diocesane che si è part);</p> <ul style="list-style-type: none"> • grup 2: la riflession su lis strururis, in particolâr il lôr jessi di fat a servizi da la comunitât, da la sô vite, da lis sôs atividâts e di cui che a chê al ricor, prin di dut i puars; • grup 3: la funzion dai organismi di partecipazion (i conseis pastorâl e dai afârs economics), ancje in viste dal lôr rinnovament vie pal an.
Grup 1: La qualità relazionâl da la comunitât	<p>31. Il prin grup al podarès confrontâsi su chestis domandis :</p> <ul style="list-style-type: none"> • ce domandino i oms e lis feminis dal nestri temp par sintîsi “a cjase” te Glesie? • cuâi pas indevant sino dispuescj a fâ par jessi une comunitât cristiane plui vierte, ospitâl e buine di curâ lis relazions? • esistino esperiencis di ospitalitât positivis par fruts, zovins e fameis (par es. l’oratori)? • cuale atenzion e abade vagnino dadis a lis fameis in dificoltât, a lis personis separadis o divorziadis, a cui che al vîf relazions afetivis gnovis o diviersis? • cui che al è rivât di pôc a stâ sul teritori, massime se dinazionalitât, culture e lenghe diviersis, si sintial acetât? • ce cussience vino tes comunitâts cristianis di jessi part da la diocesi, Glesie particulâr ch’è il vescul sicut so pastôr? • la esperienze da la pandemie ce puedie insegnârus a rivuart dal acet (par esempi tes celebrazions liturgjichis)? • e par un stîl familiâr da la comunitât, dulà prin di dut lis fameis ciatino bon stâ? • ce invezit ingriuijal o parfin imberdeial lis nestris relazions?
Grup 2: La riflession su lis strururis	<p>32. Il secont grup, che al dovarès vê al so interni prin di dut i membris dal consei pai afârs economics, al podarès frontâ chescj pas:</p> <ul style="list-style-type: none"> • une verifiche (almancul in gjenerâl) da lis strururis esistentis: cualis che a son, in ce condizioni di manutenzion si cjatin, cetantis risorsis che a impegnin, cemût che a vagnin dopradis; • une riflession su cemût che a podaressin jessi dopradis in futûr cun riferiment a lis esigencis da la pastorâl e da la caritât tal contest da la unitât pastorâl, ma ancje, se al è il câs, metintlis a servizi dal decanât o da la diocesi; • un confront su cualis strururis e cualis atividâts che si podaressin slizerî par servî miôr l’anunzi dal Vanzeli.
Grup 3: I organismi di coresponsabilitât	<p>33. Compit dal tierç grup al è rifleti sui organismi di partecipazion che a son te unitât pastorâl (te parochie), sedi i doi conseis pastorâl e pai afârs economics, sedi ancje chei altris grups parochiâi, par</p>

	<p>esempli dai catechiscj, dai animadôrs dal oratori e dai centris estîfs, dai animadôrs da la liturgjie, dal coro. Ancje lis agregazions o moviments che a operin te unitât pastorâl a dovaressin jessi cjapâts dentri.</p> <p>Ju interogatîfs che si puedin frontâ a son:</p> <ul style="list-style-type: none"> • cuâi sono stâts in chescj agns i aspiets positîfs e cuâi chei problematics tal lavôr dal consei pastorâl? • il consei pastorâl unitari isal atent a lis diviersis comunitàs che a son te unitât pastorâl? • cemût funzional il consei pai afârs economics? • cemût vegnie coinvolte la comunità cristiane tal so insieme? Esistie o saressie possibile une esperience di assemblee da la unitât pastorâl (o parochiâl)? • cuale esperience di sinodalitât e di partecipazion esistie tai diviers grups impegnâts tai tancj ambiti da la attività pastorâl? • cuâl rapuart isal tra lis eventuâls agregazions eclesiâls che a son te unitât pastorâl e dute la comunità? • cuâi suggerimenti ufrî a nível diocesan par la prossime rinnovazion dai conseis di unitât pastorâl (o di parochie)?
I compits dal consei pastorâl diocesan par la rinnovazion dai conseis	<p>34. Un pôcs di compits in viste da la rinnovazion dai organisims di partecipazion a son fidâts al consei pastorâl diocesan, che partant i spiete:</p> <ul style="list-style-type: none"> • compagnâ, in armonie cul grup diocesan, il confront sui conseis di unitât pastorâl (e di parochie) in sede locâl; • meti adun prin di Pasche lis riflessions sui organisims di partecipazion, confrontâlis e valutâlis; • su la fonde di chestis elaborâ i criteris che a saran a la base da lis indicazions diocesanis par la rinnovazion dai conseis, che si davuelzarà dentri dal mês di Jugn.
	<h2>IL CANTÎR DA LIS DIACONIIS E DA LA FORMAZION SPIRITUÂL</h2>
Scoltâ la Peraule	<p>35. Il servizi dentri da la comunità cristiane al dêf scomençâ dal scoltâ la Peraule di Diu. Lu à imparât Marte a Betanie. Za di tancj agns te nestre diocesi o sin impegnâts a dâ il primât al scoltâ la Peraule. Al è une vore signifcatîf vê imparât a scomençâ ogni nestri incuintri cul scoltâ, spes il Vanzeli dal dì, intun clime di cidinôr e di riflession, e dopo condividi chel che il Spirt al à fat nassi tal cûr di ognidun. Une condivision che si base su la convinzion che Diu nol fevele dome midiant da la Sacre Scripture, ma si palese midiant da lis personis e dai events. Cul calendari cuotidian “Il temp e la Peraule”, la Peraule di Diu e je jentrade ta lis cjasis di tantis personis: ancje chest an al vignarà proponût cuntune atenzion particolâr a lis storiis</p>

	<p>di santitât. L'impegn di scoltâ, curât une vore in chest an pastorâl, al è partant rivolt a chel che il Spirt al dîs ancje midiant da lis peraulis e da la vite dai fradis e da lis sûrs, nol impuarde se plui o mancul "internis" a la comunitât cristiane.</p> <p>La domande fondamentâl di chest cantîr e je: <i>cemût podino "cjaminâ adun" tal riscuvierzi la lidris spirituâl ("la part miôr") dal nostri servizi?</i></p>
Il servizi eclesiâl al nas dal scoltâ	<p>36. Dal scoltâ e nas ancje la clamade a servî. Al è il Signôr che al clame. Te Glesie no si proponisi di bessôi, no si cjanpin sù incarics e ministeris di proprie iniziative. Si rindisi disponibii daûr di chel che il Spirt i sugjeris al cûr di ognidun ancje par mieç da lis peraulis di chei altris e da lis diviersis situazions da la vite, ma al è il Signôr che al clame midiant da la Glesie.</p> <p>Il lidrisament te Peraule, une vite di fede nudride da la preiere e dai Sacraments, une partecipazion cordiâl e serene a la comunitât, la umiltât di no calcolâsi indispensabii cu la capacitât di lassâ l'incaric, a son ducj elements fondamentâi par che si vivi une vocazion reâl al servizi te Glesie.</p> <p>Chest al vâl par incarics e ministeris za in vore te nestre diocesi e ancje par chei di letôr, acolit, catechist che pape Francesc al à proponût ai fedêi laics, oms e feminis, e che o podarìn introdusi un pôc a la volte ancje te nestre Glesie, lant daûr da lis indicazions da la note pastorâl da la Conference episcopâl taliane (aprovade <i>ad experimentum</i> par un trieni) <i>"I ministeri istituiti del lettore, dell'accollito e del catechista per le Chiese che sono in Italia"</i> dai 5 di Jugn dal 2022.</p>
La dibisugne di formazion	<p>37. Un servizi competent te Glesie al domande ancje une formazion sedi te fase iniziâl, sedi lant indevant cul incaric. Sence formazion, ancje se si è ben intenzionâts, si riscje di ufrî un servizi ridutif e limitât, pôc atent a lis dibisugnis reâls, leât al bon cûr e a lis emozions dal moment.</p> <p>Te nestre diocesi a son diviersis occasions di formazion pai varis ministeris e incarics. Cualchidune al è ben tornâ a proponile dopo la interuzion causade da la pandemie, altris a pue din jessi zontadis par cure dai diviers ufficis e servizis. O ricuardi un pocjis in particolâr.</p> <p>Prin di dut chês pai sacerdots: ju incuintris di formazion, i ritîrs vie pal an, la "trê dîs" in Istât, la propueste (tornade dopo tancj agns) di esercizis spirituâl in Novembar dal 2022 o in Zenâr dal 2023.</p> <p>Po chês daûr invît ancje di conseîrs pastorâi e operadôrs pastorâi in gjenar e chês specifichis pai components dai conseis pai afârs economics. A esistin ancje iniziativis di formazion par servizis particolârs: i catechiscj (la trê dîs di fin Istât), i animadôrs di centris estîfs, i ministris straordenaris da la Comunion, i operadôrs da la Caritas, i animadôrs dai Grups da la Peraule, i animadôrs dai cors di</p>

	<p>preparazion al matrimoni, i animadôrs da la liturgjie (ancje cui che si ocupe dal cjanter e dal acer tes celebrazion). Dutis occasions preziosis e indispensabilis par puartâ indevant un ministeri o un incaric te Glesie cuntun “mandât” (a voltis conferît dal vescul in persone).</p>
Un cantîr assegnât al consei pastorâl diocesan	<p>38. Sigurade in ogni câs la pussibilitâ di un scoltâ e di un confront su chescj temis dentri vie dai conseis pastorâi o dai grups costituîts dai operadôrs dai diviers ministeris, chest cantîr al ven assegnât in particolâr al consei pastorâl diocesan. Lis cuistions di frontâ a podaressin jessi chêz ca sot:</p> <ul style="list-style-type: none"> • cemût podino “cjaminâ adun” tal riscuvierzi la lidrîs spirituâl (“la part miôr”) dal nestri servizi? • cemût podino schivâ la tentazion da la efidence smaniose o “martialism” (espression di pape Francesc) tal servizi dal scoltâ Diu e il prossim? • ce robe puedie judânus a “liberâ” il temp che al covente par vê cure da lis relazions? • cemût confermâ e tornâ a proponi il primât dal scoltâ la Peraule di Diu in tantis realtâts da la nestre diocesi? • cuâi sono i servizis e i ministeris plui preseâts e chei che si podaressin promovi te nestre comunitât cristiane? • cemût fâ rivivi in diocesi il ministeri dal diaconât? • ce puest àno o puedino vê tes comunitâtis cristianis lis personis che a vivin formis di consacrazion o di vite contemplative? • ce percors fâ in diocesi par rivâ al conferiment dai ministeris di letôr, acolit, catechist a fedêi laics, oms e feminis? Ce funzion podaressino vê chescj ministeris cun riferiment a lis unitâtis pastorâls? • cemût dâ concretece a la domande, vignude a flôr intant dal prin an dal scoltâ sinodâl, su la dibisugne di cjatâ fûr e preparâ personis che a podedin fâ di “diretôrs di oratori”?
	<h2 style="text-align: center;">CJAMINÂ ADUN VIERS LIS GNOCIS DAL AGNEL</h2>
Un cjaminâ seren e condividût	<p>39. La impression che cheste letare pastorâl e pues fâ, cu la articolazion dai cuatri cantîrs, e podarès jessi chê di un ingrumâsi di impegns che a van a zontâsi ai tancj da la vite ordenarie da lis nestris comunitâtis. Al somee duncje di contradî il desideri di tornâ al essenziâl che la fin dal moment plui dûr da la pandemie e veve fat nassi tal cûr di ducj. O pensi, però, che al sedi impuantant par vivi chest an pastorâl cun serenitât di tignî ad a ments lis avertencis e convinzioni che a son stadis ricuardadis in chest scrit. O torni in sintesi su cuatri.</p> <p>La prime: la impuantance di cjaminâ adun cu la Glesie taliane in ubidience a chel che nus à domandât cun fuarce pape Francesc in</p>

	<p>viste di un rînovament vîr dal nestri jessi Glesie, a la lûs in particolâr da la <i>Evangelii gaudium</i>.</p> <p>Un secont avertiment: dut il lavôr al è orientât pal plui al scoltâ, si varà temp tai agns cu vegnin par madressi decisions operativis e par sperimentâlis.</p> <p>La tierce: i cuatri cantîrs no son altri che i nons di cuatri ambitz za presints te vite cuotidiane da lis comunitâts, ambitz che nus ven domandât di dâur une atenzion specifiche, ma sence agitazions o pretesis.</p> <p>Tal ultin une cuarte: l'impuartant al è che ognidun al fasi la sô part, par chel che al è in podê e che al rive, e al vivi la bielece di condividi cun gaudie e ricognossince il lavôr di altris.</p>
O cjaminìn bande il Ream (partint di Betanie...)	<p>40. Se o sarìn atents tal scoltâ, ancje il percors di chest an al sarà produtîf e al fasarà cressi il nestri desideri viers il Signôr e il compiment dal so Ream, viers la Gjerusalem dal cîl. Betanie e je dome une fase, no je ancjemò Gjerusalem. E no bisugne dismenteâ che Gjesù al è tornât a Betanie dopo la Pasche, ma par lâ sù in Cîl e fidânum la mission di jessi siei testimonis cu la fuarce dal Spirt:</p> <p>«<i>Po ur disè: "A son chestis lis peraulis che jo us disei cuant che o jeri cun voaltris: bisugne che si compissin dutis lis robis che a son stadis scritis sul gno cont te leç di Mosè, tai Profetis e tai Salms". Alore ur vierzè la ment par dicerni lis Scrituris e ur disè: "Cussì al è scrit: il Crist al patissarà e la tierce dì al risussitarà dai muarts, e tal so non si predicjarà a ducj i popui la conversion e il perdon dai pecjâts, scomençant di Gjerusalem. Di dut chest voaltris o sarès testimonis. E ve, jo o mandi sore di voaltris chel che il Pari gno al à imprometût; ma voaltris restait in citât fintant che no sarès rivistûts di une fuarce ch'e ven di adalt". Po ju menâ fûr bande Betanie e, alçadis lis mans, ju benedî. Instant che ju benedive, si distacà di lôr e al vignive puartât sù, in cîl» (Luche 24,44-51).</i></p> <p>A Betanie si pues sostâ e stâ a scoltâ, ma po bisugne lâ tal mont spietant di rivâ ducj a la Gjerusalem, chê dal cîl. O, se o volês, a lis gnocis dal Agnel cu la Spose che par intant o intraviodin dome il splendôr futûr. Ma si sta preparant, ancje ca e cumò:</p> <p>«<i>Po al rivà un dai siet agnui, ch'e àn lis siet copis plenis dai ultins siet flagjei, e mi disè: "Ven, ti mostrerà la fantate, la nuvice dal Agnel". L'agnul mi traspuartà in spirt suntune mont une vore alte e mi mostrà la citât sante, Gjerusalem, ch'e vignive jù dal cîl, di Diu, iluminade da la glorie di Diu»</i> (Apocalîs 21,9-10).</p>

ZONTE 1: LIS FASIS DAL PERCORS SINODÂL IN DIOCESI

Dentri da la fin di Novembar:

I conseis pastorâi di unitât pastorâl (o di parochie) a cjatin fûr i referents dal scoltâ tai diviers ambiti. Chê stesse robe e ven fate a nivel decanâl e diocesan. I nominatîfs dai referents si ju comuniche al grup sinodâl.

A sono proponûts doi moments gjenerâi di formazion:

- miercus ai 16 di Novembar: incuintri di formazion pai conseîrs e pai referents dal scoltâ;
- miercus ai 14 di Dicembar: incuintri di formazion pai referents dal scoltâ su cemût promovi un scoltâ che al zovi.

Il grup sinodâl, in colaborazion cui ufcis e i servizis di curie, al podarà proponi vie pal an cualchi iniziative di formazion (ancje *online*) par ambiti specifics.

Zenâr-Pasche:

I referents dal scoltâ a clamin un pocjis di personis (8-10 par ogni grup) di scoltâ e cun lôr confrontâsi.

Dentri di Pasche al covente mandâ la sintesi dai incuintris e di dutis lis iniziativis al grup sinodâl.

Jugn dal 2023:

Assemblee diocesane (cui conseis pastorâi gnûfs) cu la presentazion da la sintesi diocesane dal secont an dal scoltâ sinodâl e la indicazion in curt da lis prospetivis par la continuazion dal percors sinodâl in comunion cu la Glesie taliane e universâl.

ZONTE 2: CUI CHE AL FÂS, CUANT, CE

CUI	CUANT	CE
Ogni batiât adult	simpri	<ul style="list-style-type: none"> • interessâsi da lis gnovis nassitis e proponisi come leam par favorî l'incuintri cu la comunitàt parochiâl; • jessi disponibil cui adults che a puedin jessi interessâts al Batisim e che a domandin la Cresime; • fâ di “punt” tra lis propriis frecuentazions e lis iniziativis a pro dal scoltâ sinodâl.
Conseis pastorâi di unitât pastorâl o parochiâi	dentri da la fin di Novembar	<ul style="list-style-type: none"> • lei cun atenzion la letare pastorâl; • sielzi eventuâi ambiis dal scoltâ là che si intint impegnâsi in plui di chei decanâi e chei comuns a ducj; • viodi di ocasions par scoltâ lis istituzions civils e militârs che a son sul propri teritori; • organizâ i trê grups dal scoltâ dal cantîr “ospitalitât e cjase”: <ol style="list-style-type: none"> 1. verifiche dai rapuarts internis; 2. riflession su lis struturis; 3. organisims di partecipazion; • cjatâ fûr i referents dai diviers ambiis dal scoltâ sinodâl;
	tra Zenâr e Pasche	<ul style="list-style-type: none"> • promovi incuintris par scoltâ lis autoritâts civils e militârs; • promovi incuintris dal scoltâ relatîfs a: <ol style="list-style-type: none"> 1) verifiche dai rapuarts internis; 2) riflession su lis struturis (adun cui conseis pai afârs economics); 3) organisims di partecipazion;
	dentri di Pasche	comunicâ la sintesi dai incuintris al grup sinodâl;
	dentri di Jugn	rinnovament dai conseis daûr da lis indicazions diocesanis.
Conseis pai afârs economics	dentri da la fin di Novembar	colaborâ cul consei pastorâl par cjatâ fûr il referent par la riflession su lis struturis;
	tra Zenâr a Pasche	Promovi incuintris dal scoltâ relatîfs a la riflession su lis struturis (adun cui conseis pastorâi);
	dentri di Pasche	comunicâ la sintesi dai incuintris al grup sinodâl.

Agregazions laicâls a nível di unitât pastorâl o parochiâl	simpri	colaborâ cui conseis pastorâi par la organizazion dal scoltâ parochiâl.
Decanâts	dentri da la fin di Novembar	<ul style="list-style-type: none"> cjatâ fûr i referents dal scoltâ sinodâl a nível decanâl pai cresemâts adults; e pai ambits specifics di ogni decanât;
	tra Zenâr e Pasche	<ul style="list-style-type: none"> promovi almancul un incuintri dal scoltâ par ambit specific; promovi un incuintri dal scoltâ dai cresemâts adults dai ultins agns;
	dentri di Pasche	comunicâ la sintesi dai incuintris al grup sinodâl.
Plevan e catechiscj batesimâi	dentri di Pasche	<ul style="list-style-type: none"> promovi un incuintri dal scoltâ di gjenitôrs e santui dai ultins agns; organizâ un-doi incuintris cu lis fameis dai batiâts; cirî un contat mandant preieris, auguris, sussidis, e v.i.; comunicâ la sintesi dai incuintris al grup sinodâl.
Plevan e catechiscj da la iniziazion cristiane	sul scomençâ dal an catechistic	Cjatâ il temp pai incuintris personâi cui gjenitôrs;
	dentri di Pasche	<ul style="list-style-type: none"> promovi incuintris dal scoltâ dai gjenitôrs; promovi incuintris dal scoltâ dai zovins da la Cresime; comunicâ la sintesi dai incuintris al grup sinodâl.
Consei pastorâl diocesan	dentri da la fin di Novembar	<ul style="list-style-type: none"> rifletti su la tematiche dai ministeris; cjatâ fûr al propri interni i incaricâts dal scoltâ sinodâl sul teme dai ministeris; compagnâ, in cunvigne cul grup diocesan, il confront sui conseis di unitât pastorâl (e di parochie) in sede locâl;
	tra Zenâr e Pasche	<ul style="list-style-type: none"> promovi incuintris dal scoltâ sul teme dai ministeris in dialic cun religjôs, ufici liturgjic, ufici catechistic, pastorâl da lis vocazions, incaricât pal diaconât;
	dopo Pasche	<ul style="list-style-type: none"> tirâ adun lis riflessions sui organisms di partecipazion dai grups dal scoltâ in diocesi, confrontâlis e valutâlis; su la fonde di chestis elaborâ i criteris che a saran fondament da lis indicazions diocesanis pal rinnovament dai conseis, che si fasarà dentri

		dal mês di Jugn.
Ufici catechistic, Pastorâl familiâr e Pastorâl dai zovins	dentri l'inizi di Novembar	dâ indicazions su cemût organizâ l'incuintri dal scoltâ di fameis e zovins da la catechesi.
Servizi pal catecumenât	tra Zenâr e Pasche	<ul style="list-style-type: none"> • promovi un incuintri dal scoltâ di batiâts adults dai ultins agns e dai lôr santui; • sostignî incuintris dal scoltâ tai decanâts di cresemâts adults dai ultins agns;
	dentri di Pasche	comunicâ la sintesi dai incuintris al grup sinodâl.
Caritas	dentri la fin di Novembar	dâ indicazions sul scoltâ dal mont dai "puars";
	tra Zenâr e Pasche	promovi incuintris sul scoltâ dal mont dal volontariât;
	dentri di Pasche	comunicâ la sintesi dai incuintris al grup sinodâl.
Pastorâl da la salût	tra Zenâr e Pasche	promovi incuintris dal scoltâ cun ospedâi, cjasis di cure, RSA, realtâts assistenziâls;
	dentri di Pasche	comunicâ la sintesi dai incuintris al grup sinodâl.
Migrantes – Caritas	tra Zenâr e Pasche	promovi incuintris dal scoltâ par rifugjâts e par chei che a domandin asil;
	dentri di Pasche	comunicâ la sintesi dai incuintris al grup sinodâl.
Pastorâl sociâl e dal lavôr	tra Zenâr e Pasche	promovi incuintris dal scoltâ par istituzions civîls e militârs a nivel provincial;
	dentri di Pasche	comunicâ la sintesi dai incuintris al grup sinodâl.
Insegnants di religion catoliche	dentri di Pasche	<ul style="list-style-type: none"> • promovi incuintris dal scoltâ tra i students di scuelis mediis e superiôrs, massime tes classis che no àn vût part l'an passât; • e altris iniziativis dal scoltâ tal mont da la scuele; • comunicâ la sintesi dai incuintris al grup sinodâl.